

## Nowodhow an Seythen

16/12/08

Yma Kernow ow strivya erbynn nerthow krev a'n erbysieth treusvysyek.

Y'n seythen yw passyes ni a glewas bos pymthek kans person owth oberi rag Woolworths y'gan pow ni... ha lemmyn yma an gwerthji na ow tegea.

Yth esa lostow hir a brenysi yn Woolies a-hys Kernow owth assaya prena rohow Nadelik orth bargaen da ha kost isel.

Lemmyn y klewyn moy a nowodhow tewl.

Rol a vohosegneth a-hys Pow Sows ha Kernow war-barth a dhiskwa bos Keryer yn-mysk an gwettha peswar tyller.

Yth esa Pennsans pur uhel war rol an ranndiryow gans chioh daskemerys gans arhantiow.

Ha mar kerdhir a-hys Stret Veur yn trevow kepar ha Rysrudh, y hwelir lies gwerthji deges.

\*\*

Unn den re verwis orth porth Aberfal.

An lewyer kert a dheuth ha bos stak yn-dann bern a lo.

An tanlu a'n tennas 'mes, ha danvenys veu dhe glavji Truru y'n ayrambo.

Byttegyns ev a verwis yn Trelysk.

Yma sodhogyon Yehes ha Sawder ow hwithra an droglam.

\*\*

Unn person a verwis war an fordh deg-warn-ugens dhe Gammbron dhe'n bennseythen.

Yth esa droglam meur orth pris li dy' Sadorn pan skwattyas eth karr an eyl erbynn y gila.

\*\*

Yma ow kildenna an den neb a ledyas Tanlu Kernow dres termyn kudynnek.

Y fydh Matt Littmoden ow kasa y soodh orth diwedh a vis Meurth.

Dres y dermyn... yth esa an tan orth Ostel Penhallow ha tri ferson kellys ynno.

Hag yth esa kaskyrgh gwitha kresennow tan yn igor a-hys an nos dhe Aberfal ha

Kammbron.

\*\*

Hag yma lymner anaswonnys ow mos a-der-dro Tewyn Bleustra ow kasa bylli y'n stretys... ha warnedha lymnansow Nadelik.

Piw ywa? Ny'n aswon denvyth.

Mes dell hevel, yma ow kul hemma rag ri dhyn neb rynnrik an styr Nadelik gwir.

\*\*

Ha gans hemma... ottomma diwettha derivas Nowodhow an Seythen dew-vil-hag-eth.

Y tehwelav wosa an vledhen nowyth gans moy a nowodhow.

Bys y'n prys na y karsen pysi bos Nadelik lowen dhywgh... ha re'gas bo bledhen nowyth da ynwedh.